



Deputà Beat Deplazes (ps Cuira)

LQ

Urs e lufs in tema er en l'ura da dumondas

■ **(anr/fa) Animals da rapina gronds penetreschan dapi intgins onns regularmain il territori dal chantun Grischun. Els dattan er adina puspè da discurren en il cussegl grond.** «Il tema animals da rapina gronds occupa adina daplirs umans en adina dapliras regiuns da noss chantun, ier a Vaz Sut, oz en il Puschlav e damaun a Mustér», ha ditg *Beat Deplazes* (suppl. deputà ps, Cuira) a chaschun da l'ura da dumondas. Malgrà ch'il chantun saja confruntà gia dapi onns cun lufs ed urs n'haja'l anc adina betg elavurà in concept co sa cuntegnair cun quests animals, ha'l constatà e dumandà la regenza tge ch'il chantun fetschia in quest connex. Cussegliaer guvernativ *Mario Cavigelli* ha menziunà che la confederaziun prescriviva che lufs, urs e lufs-tscherver sajan animals protegids. «Cunquai ch'igl exista per tuts trais da quests animals da rapina mintgamai in concept federal n'è

la regenza betg da l'avis ch'i saja dad elavurar anc concepts chantunals.» Il chantun saja activ en emprima lingua en il sector da las mesiras da prevenziun, protecziun da las muntaneras sco era l'installaziun da recipients da ruments segirs cunter l'urs tant en vischinanza d'abitadis sco era lung la via chantunala, ha ditg *Cavigelli*. A l'avis da la regenza na dovri betg in post da coordinaziun aposta per las dumondas e temas davart quests animals, «dad ina vart èsi l'uffizi da chatscha e pesta che surveglia ils animals e vegn activ cun empruvar da spaventar ils urs, da l'autra cusseglia il post spezialisà dal Planthof als purs ed er a las vischnancas co proteger las muntaneras sin las alps.» Igl existia era dapi l'onn 1999 ina grupp da lavur che organischeschia periodicamain maisas radundas cun participants da tut las gruppas d'interess, ha agiunt il cussegliar guvernativ.